

# 《佛說無量壽經》講表

## 前言

壹、修持淨土法門應有之基本認知

○徹悟禪師開示八要：

- 一、真為生死，發菩提心，是學道通途。
- 二、以深信願，持佛名號，為淨土正宗。
- 三、以攝心專注而念，為下手方便。
- 四、以折伏現行煩惱，為修心要務。
- 五、以堅持四重戒法，為入道根本。
- 六、以種種苦行，為修道助緣。
- 七、以一心不亂，為淨業歸宿。
- 八、以種種靈瑞，為往生證驗。

## 貳、研究《佛說無量壽經》之目的

一、依解起行：解如目，不盲修瞎練；行如足，不說食數寶。

瀉益大師於《彌陀要解》云：「當知離卻現前一念無量光壽之心（體、性），何處有阿彌陀名號（用、相）；而離卻阿彌陀名號，何由徹證現前一念無量光壽之心。願深思之！願深思之！」蓮池大師於《彌陀疏鈔》云：「託彼名號，顯我自心。」

二、使令深信切願篤行：如瀉益大師於《彌陀要解》之正宗分指出：「廣陳彼土依正妙果以啟信，特勸眾生應求往生以發願，正示行者執持名號以立行。」

三、自利利他：如《八大人覺經》云：「愚痴生死，菩薩常念，廣學多聞，增長智慧，成就辯才，教化一切，悉以大樂。」又如瀉益大師於《靈峰宗論》云：「諸法無性，盡隨心轉。心為名利，一切趨名利；心為菩提，一切趨菩提。」

# 《佛說無量壽經》

曹魏天竺三藏康僧鎧大師譯

○將述此經，大分為三：

壹、解釋經題

貳、經文大意

參、隨文釋義

今初

甲一、釋別名：

釋「佛」字

○「佛」——梵語「佛陀耶」，此翻覺者，謂自覺、覺他、覺行圓滿。自覺不同凡夫，覺他不同二乘，覺滿不同菩薩。即是釋迦牟尼佛，萬德慈尊，娑婆世界之教主也。

釋「說」字

○「說」——悅所懷也。佛以度生為懷，機緣未至，默然待時；機緣既熟，應病與藥也。

釋「無量壽」

○「無量壽」——梵語「阿彌陀」，此翻無量壽或無量光。

《無量壽經義疏》云：「此佛從其壽命彰名。壽有真、應：真即常住，性同虛空；應壽不定，或長或短。今此所論，是應非真。於應壽中，此佛壽長，凡夫二乘不能測度，知其限算，故曰無量。」

又云：「命限稱壽，云何得知是應非真？如《觀世音及大勢至授記經》說，無量壽佛壽雖長遠，亦有終盡。彼佛滅後，觀世音、大勢至次第作佛，故知是應。」

## 甲二、釋通名——「經」

○「經」——梵語 *sutra*，音譯為「修多羅」，義譯為「線」，此云「契經」。即是上能契合諸佛所證之理，下能契合眾生之根機。

又「經」有貫穿、攝化之意。  
亦可釋為「常」或「法」。

約「常」而言，即是「經」的義理，能經古歷今乃至未來，恆常不變，如因緣果報、真如自性。

約「法」而言，從修行的角度來看，即是普十方而同遵。

### 貳、經文大意

分五：

甲一、證信序：廣歎菩薩權實二德及自他二利之功德。

原因：

- 一、使令啟發菩提心
- 二、使了知修學次第
- 三、認知體用之關係：  
體乃即用之體，用乃即體之用。

**甲二、此經發起因緣：世尊現瑞。**

如經云：「爾時世尊，諸根悅豫，姿色清淨，光顏巍巍。」

**甲三、示彌陀淨土因果以啟信：**

乙一、因地勝行 依止之勝緣

發起之勝願

**乙二、果地聖德**

明淨土依正莊嚴

示生者受用殊勝

**甲四、明往生極樂因果以啟願：**

乙一、示往生正因

乙二、歎淨土殊勝

甲五、勸除毒斷惡以成往生之基

- 乙一、勸離三毒  
乙二、誠斷五惡

○**本經宗旨**：以發菩提心，一向專念無量壽佛為宗。

《彌陀要解》云：「具此深信，方能發於大願。深信發願，即無上菩提。合此信願，的為淨土指南。由此而執持名號，乃為正行。」

○**本經功用**：以斷疑生信，往生不退為用。

○入文分三：甲一、序分。 甲二、正宗分。 甲三、流通分。

甲一、序分（分二：乙一、通序。 乙二、別序）

乙一、通序（分二：丙一、標法會時處。 丙二、引大眾同聞）

丙一、標法會時處

我聞如是。一時，佛住王舍城，耆闍崛山中。

丙二、引大眾同聞（分二：丁一、聲聞眾。 丁二、菩薩眾）

丁一、聲聞眾（分三：戊一、明類標數。 戊二、表位歎德。 戊三、列上首名）

戊一、明類標數

與大比丘眾，萬二千人俱。

戊二、表位歎德

一切大聖，神通已達。

戊三、列上首名

其名曰：尊者了本際、尊者正願、尊者正語、尊者大號、尊者仁賢、尊者離垢、尊者名聞、尊者善實、尊者具足、尊者牛王、尊者優樓頻螺迦葉、尊者伽耶迦葉、尊者那提迦葉、尊者摩訶迦葉、尊者舍利弗、尊者大目犍連、尊者劫賓那、尊者大住、尊者大淨志、尊者摩訶周那、尊者滿願子、尊者離障、尊者流灌、尊者堅伏、尊者面王、尊者異乘、尊者仁性、尊者嘉樂、尊者善來、尊者羅云、尊者阿難，皆如斯等上首者也。

丁二、菩薩眾（分三：戊一、列其名字。戊二、讚歎其德。戊三、總辨其數）

戊一、列其名字

又與大乘眾菩薩俱，普賢菩薩、妙德菩薩、慈氏菩薩等，此賢劫中一切菩薩；又賢護等十六正士，善思議菩薩、**慧辯才菩薩**、信慧菩薩、空無菩薩、神通華菩薩、光英菩薩、慧上菩薩、智幢菩薩、寂根菩薩、願慧菩薩、香象菩薩、寶英菩薩、中住菩薩、制行菩薩、解脫菩薩。

戊二、讚歎其德（分二：己一、歎其權實二德。己二、歎其二利功德）

己一、歎其權實二德（分三：庚一、略歎其德。庚二、廣歎其德。庚三、雙以結歎權實二德）

庚一、略歎其德

皆遵普賢大士之德，具諸菩薩無量行願，安住一切功德之法，遊步十方，行權方便。

庚二、廣歎其德（分二：辛一、歎其實德。辛二、歎其權德）

辛一、歎其實德

入佛法藏，究竟彼岸。

辛二、歎其權德（分二：壬一、總歎八相成道。壬二、別顯）

壬一、總歎八相成道

於無量世界，現成等覺。

壬二、別顯（分九：癸一、升兜率天。癸二、入胎相。癸三、出胎相。癸四、童子相。

癸五、納妻相。癸六、出家相。癸七、成道相。癸八、轉法輪相。  
癸九、入涅槃相）

癸一、升兜率天

處兜率天，弘宣正法。

癸二、入胎相

捨彼天宮，降神母胎。

癸三、出胎相

從右脅生，現行七步。光明顯耀，普照十方。無量佛土，六種震動。舉聲自稱：吾當於世，為無上尊，釋梵奉侍，天人歸仰。

癸四、童子相

示現算計、文藝、射御，博綜道術，貫練群籍。

癸五、納妻相

遊於後園，講武試藝。現處宮中，色味之間。

癸六、出家相

見老病死，悟世非常。棄國財位，入山學道。服乘白馬，寶冠、瓔珞，遣之令還。捨珍妙衣，而著法服。剃除鬚髮，端坐樹下，勤苦六年，行如所應。

癸七、成道相（分五：子一、沐浴形垢。子二、行詣道場。子三、瑞草應聖。子四、智力降魔。

子五、現成佛道）

子一、沐浴形垢

現五濁刹，隨順群生。示有塵垢，沐浴金流。天按樹枝，得攀出池。

子二、行詣道場

靈禽翼從，往詣道場。

子三、瑞草應聖

吉祥感徵，表章功祚。哀受施草，敷佛樹下，跏趺而坐。

子四、智力降魔

奮大光明，使魔知之。魔率官屬，而來逼試。制以智力，皆令降伏。

子五、現成佛道

得微妙法，成最正覺。

癸八、轉法輪相（分二：子一、請轉法輪。子二、因請起說）

子一、請轉法輪

釋梵祈勸，請轉法輪。

子二、因請起說（分二：丑一、身口起化。丑二、身口攝益）

丑一、身口起化

以佛遊步，佛吼而吼。扣法鼓，吹法螺，執法劍，建法幢，震法雷，曜法電，澍法雨，演法施。常以法音，覺諸世間。

丑二、身口攝益（分四：寅一、身業伏魔，令離邪業。寅二、口業破邪，令離煩惱。

寅三、身業受供，生人福善。寅四、口業說法，令修出道）

寅一、身業伏魔，令離邪業

光明普照無量佛土。一切世界，六種震動。總攝魔界，動魔宮殿。眾魔懾怖，莫不歸伏。

寅二、口業破邪，令離煩惱

擗裂邪網，消滅諸見，散諸塵勞，壞諸欲塹。嚴護法城，開闡法門。洗濯垢污，顯明清白。光融佛法，宣流正化。

寅三、身業受供，生人福善

入國分衛，護諸豐饒。貯功德，示福田。

寅四、口業說法，令修出道

欲宣法，現欣笑。以諸法藥，救療三苦。顯現道意，無量功德。授菩薩記，成等正覺。

癸九、入涅槃相

示現滅度，拯濟無極。消除諸漏，植眾德本。

庚三、雙以結歎權實二德

具足功德，微妙難量。遊諸佛國，普現道教。

己三、歎其二利功德（分二：庚一、略歎。庚二、廣歎）

庚一、略歎

其所修行，清淨無穢。譬如幻師，現眾異像。為男為女，無所不變。本學明了，在意所為。此諸菩薩，亦復如是。學一切法，貫綜縷練，所住安諦，靡不感化。無數佛土，皆悉普現。未曾慢恣，愍傷眾生。如是之法，一切具足。

庚二、廣歎（分四：辛一、依菩薩法，修自分行。辛二、明依佛法，修勝進行。辛三、依前自分，廣修成德。

辛四、依前勝進，辨修成德）

辛一、依菩薩法，修自分行

菩薩經典，究暢要妙，名稱普至，道御十方。

辛二、明依佛法，修勝進行

無量諸佛，咸共護念。佛所住者，皆已得住。大聖所立，而皆已立。如來道化，各能宣布。為諸菩薩，而作大師。以甚深禪慧，開導眾生。通諸法性，達眾生相，明了諸國。

辛三、依前自分，廣修成德（分四：壬一、攝修方便。壬二、因修成德。壬三、重明起修。壬四、重明所成）

壬一、攝修方便（分四：癸一、初明自利，明修教行。癸二、次明利他，教人離過。）

癸三、復明自利，明修證行。癸四、重明利他，教令修善）

癸一、初明自利，明修教行

供養諸佛，化現其身，猶如電光。善學無畏之網，曉了幻化之法。

癸二、次明利他，教人離過

壞裂魔網，解諸纏縛。

癸三、復明自利，明修證行

超越聲聞、緣覺之地，得空、無相、無願三昧。

癸四、重明利他，教令修善

善立方便，顯示三乘。於此化終，而現滅度。

壬二、因修成德（分二：癸一、自利功德。癸二、利他功德）

癸一、自利功德（分四：子一、所證平等。子二、所成眾多。子三、所證深廣。子四、所成殊勝）  
子一、所證平等

亦無所作，亦無所有。不起不滅，得平等法。

子二、所成眾多

具足成就無量總持，百千三昧，諸根智慧。

子三、所證深廣

廣普寂定，深入菩薩法藏。

子四、所成殊勝

得佛華嚴三昧。

癸二、利他功德

宣揚演說一切經典。

壬三、重明起修

住深定門，悉覩現在無量諸佛，一念之頃，無不周徧。濟諸劇難，諸閑不閑，分別顯示真實之際，得諸如來辯才之智。入眾言音，開化一切。

#### 壬四、重明所成

超過世間諸所有法，心常諦住度世之道。於一切萬物，而隨意自在。為諸庶類，作不請之友。荷負群生，為之重擔。

辛四、依前勝進，辨修成德（分二：壬一、辨其所修。壬三、明其所成）

#### 壬一、辨其所修

受持如來甚深法藏，護佛種性，常使不絕。興大悲，愍眾生。演慈辯，授法眼。杜三趣，開善門。以不請之法，施諸黎庶。如純孝之子，愛敬父母。於諸眾生，視若自己。

#### 壬二、明其所成

一切善本，皆度彼岸。悉獲諸佛無量功德。智慧聖明，不可思議。

#### 戊三、總辨其數

如是之等菩薩大士，不可稱計，一時來會。

乙二、別序（分六：丙一、世尊現瑞。丙二、阿難請問。丙三、如來審問。丙四、阿難實答。

丙五、如來歎問）

丙一、世尊現瑞

爾時世尊，諸根悅豫，姿色清淨，光顏巍巍。

丙二、阿難請問（分二：丁一、具儀啓請。丁二、正宣諸辭）

丁一、具儀啓請

尊者阿難，承佛聖旨，即從座起，偏袒右肩，長跪合掌，而白佛言：

丁二、正宣諸辭（分三：戊一、明己所見。戊二、彰己所念。戊三、詰問所爲）

戊一、明己所見

今日世尊，諸根悅豫，姿色清淨，光顏巍巍。如明鏡淨，影暢表裏。威容顯耀，超絕無量。未曾瞻覩殊妙如今。

戊二、彰己所念

唯然大聖，我心念言：今日世尊住奇特之法；今日世雄住佛所住；今日世眼住導師之行；今日世英住最勝之道；今日天尊行如來之德；去來現在，佛佛相念，得無今佛念諸佛耶？

戊三、詰問所爲

何故威神，光光乃爾？

丙三、如來審問

於是世尊告阿難曰：云何阿難，諸天教汝來問佛耶？自以慧見問威顏乎？

丙四、阿難實答

阿難白佛：無有諸天來教我者，自以所見問斯義耳。

丙五、如來歎問（分二一：丁一、歎其所問。丁二、勅聽許說）

丁一、歎其所問

佛言：善哉阿難！所問甚快。發深智慧，真妙辯才。愍念眾生，問斯慧義。如來以無盡大悲，矜哀三界，所以出興於世，光闡道教。欲拯濟群萌，惠以真實之利。無量億劫，難值難見。猶靈瑞華，時時乃出。今所問者，多所饒益，開化一切諸天人民。

丁二、勅聽許說（分二：戊一、廣舉佛德，明己能說。戊二、敕聽許說，說己所念）

戊一、廣舉佛德，明己能說（分二：己一、就果明勝。己二、辨因顯果）

己一、就果明勝

阿難！當知如來正覺，其智難量，多所導御。慧見無礙，無能遏絕。以一餐之力，能住壽命億百千劫，無數無量，復過於此，諸根悅豫，不以毀損。姿色不變，光顏無異。

己二、辨因顯果

所以者何？如來定慧，究竟無極，於一切法，而得自在。

戊二、敕聽許說，說己所念

阿難諦聽，今為汝說。對曰：唯然，願樂欲聞。

甲二、正宗分【分三：乙一、明其所行（彰彼如來本昔所修無量行願）。

乙二、明其所成（彰彼如來現今所得身土之果）。

乙三、明其所攝（彰彼如來現今攝取無量眾生）】

丙一、初列多佛，明起行緣

佛告阿難：乃往過去，久遠無量不可思議無央數劫，錠光如來，興出於世，教化度脫無量眾生，皆令得道，乃取滅度。次有如來，名曰光遠，次名月光，次名栴檀香，次名善山王，次名須彌天冠，次名須彌等曜，次名月色，次名正念，次名離垢，次名無著，次名龍天，次名夜光，次名安明頂，次名不動地，次名琉璃妙華，次名琉璃金色，次名金藏，次名炎光，次名炎根，次名地種，次名月像，次名日音，次名解脫華，次名莊嚴光明，次名海覺神通，次名水光，次名大香，次名離塵垢，次名捨厭意，次名寶炎，次名妙頂，次名勇立，次名功德持慧，次名蔽日月光，次名日月琉璃光，次名無上琉璃光，次名最上首，次名菩提華，次名月明，次名日光，次名華色王，次名水月光，次名除癡冥，次名度蓋行，次名淨信，次名善宿，次名威神，次名法慧，次名鸞音，次名師子音，次名龍音，次名處世。如

此諸佛，皆悉已過。爾時，次有佛，名世自在王如來、應供、等正覺、明行足、善逝、世間解、無上士、調御丈夫、天人師、佛、世尊。

丙二、次彰法藏，依之起行（分二：丁一、明世間之行。丁二、明出世之行）

丁一、明世間之行（分三：戊一、聞法發心。戊二、出家修道。戊三、禮讚發願）

戊一、聞法發心

時有國王，聞佛說法，心懷悅豫，尋發無上正真道意。

戊二、出家修道

棄國捐王，行作沙門，號曰法藏，高才勇哲，與世超異。

戊三、禮讚發願（分二：己一、具禮稱讚。己二、讚歎佛德。己三、發願求佛）

己一、具禮稱讚

詣世自在王如來所，稽首佛足，右繞三匝，長跪合掌，以頌讚曰：

己二、讚歎佛德

光顏巍巍，威神無極。如是炎明，無與等者。

日月摩尼，珠光燄耀，皆悉隱蔽，猶如聚墨。

如來容顏，超世無倫。正覺大音，響流十方。

戒聞精進，三昧智慧，威德無侶，殊勝希有。

深諦善念，諸佛法海，窮深盡奧，究其涯底。

無明欲怒，世尊永無。人雄師子，神德無量。

功勳廣大，智慧深妙，光明威相，震動大千。

己三、發願求佛（分二：庚一、正起願心。庚二、請佛證知）

庚一、正起願心（分二：辛一、求佛法身。辛二、求佛淨土）

辛一、求佛法身

願我作佛，齊聖法王。過度生死，靡不解脫。

布施調意，戒忍精進，如是三昧，智慧無上。

吾誓得佛，普行此願。一切恐懼，為作大安。

假令有佛，百千億萬，無量大聖，數如恆沙。

供養一切，斯等諸佛，不如求道，堅正不卻。

### 辛二、求佛淨土

譬如恆沙，諸佛世界，復不可計，無數刹土，光明悉照，徧此諸國。如是精進，威神難量。令我作佛，國土第一。其眾奇妙，道場超絕，國如泥洹，而無等雙。我當愍哀，度脫一切。十方來生，心悅清淨，已至我國，快樂安隱。

### 庚二、請佛證知

幸佛信明，是我真證。發願於彼，力精所欲。

十方世尊，智慧無礙，常令此尊，知我心行。

假使身止，諸苦毒中，我行精進，忍終不悔。

丁二、明出世之行（分二：戊一、略明所修。戊二、廣明所行）

戊一、略明所修（分三：己一、法藏初請，如來反答。己二、法藏重請，如來宣說。

己三、法藏聞說，依法修行）

己一、法藏初請，如來反答

佛告阿難：法藏比丘說此頌已，而白佛言：唯然，世尊。我發無上正覺之心。願佛為我廣宣經法，我當修行，攝取佛國清淨莊嚴無量妙土。令我於世，速成正覺，拔諸生死勤苦之本。佛告阿難：時世自在王佛語法藏比丘：如所修行，莊嚴佛土，汝自當知。

己二、法藏重請，如來宣說

比丘白佛：斯義弘深，非我境界。唯願世尊，廣為敷演諸佛如來淨土之行，我聞此已，當如說修行，成滿所願。爾時，世自在王佛，知其高明，志願深廣，即為法藏比丘而說經言：譬如大海，一人斗量，

經歷劫數，尚可窮底，得其妙寶。人有至心精進，求道不止，會當剋果，何願不得？於是世自在王佛，即為廣說二百一十億諸佛剝土，天人之善惡，國土之粗妙，應其心願，悉現與之。

己三、法藏聞說，依法修行

時彼比丘，聞佛所說嚴淨國土，皆悉覩見，起發無上殊勝之願。其心寂靜，志無所著。一切世間，無能及者。具足五劫，思惟攝取莊嚴佛國清淨之行。阿難白佛：彼佛國土，壽量幾何？佛言：其佛壽命，四十二劫。時法藏比丘，攝取二百一十億諸佛妙土清淨之行。

戊二、廣明所行（分二：己一、廣前大願。己二、廣前所行）

己一、廣前大願（分六：庚一、申己所修。庚二、如來遣說。庚三、宣說大願。庚四、立誓自要。

庚五、現瑞記歎。庚六、總以結歎）

庚一、申己所修

如是修已，詣彼佛所，稽首禮足，遶佛三匝，合掌而住，白佛言：「世尊！我已攝取莊嚴佛土清淨之行。」

庚二、如來遣說

佛告比丘：汝今可說，宜知是時，發起悅可一切大眾。菩薩聞已，修行此法，緣致滿足無量大願。

庚三、宣說大願

比丘白佛：唯垂聽察！如我所願，當具說之：

第一願、國無惡道

設我得佛，國有地獄、餓鬼、畜生者，不取正覺。

第二願、不更惡道

設我得佛，國中天人壽終之後，復更三惡道者，不取正覺。

第三願、身真金色

設我得佛，國中天人，不悉真金色者，不取正覺。

第四願、形色相同

設我得佛，國中天人，形色不同，有好醜者，不取正覺。

第五願、宿命智通

設我得佛，國中天人，不識宿命，下至知百千億那由他諸劫事者，不取正覺。

第六願、天眼普見

設我得佛，國中天人，不得天眼，下至見百千億那由他諸佛國者，不取正覺。

第七願、天耳普聞

設我得佛，國中天人，不得天耳，下至聞百千億那由他諸佛所說，不悉受持者，不取正覺。

第八願、他心悉知

設我得佛，國中天人，不得見他心智，下至知百千億那由他諸佛國中，眾生心念者，不取正覺。

第九願、神足無礙

設我得佛，國中天人，不得神足，於一念頃，下至不能超過百千億那由他諸佛國者，不取正覺。

第十願、不貪計身

設我得佛，國中天人，若起想念貪計身者，不取正覺。

第十一願、住定證滅

設我得佛，國中天人，不住定聚，必至滅度者，不取正覺。

第十二願、光明無量

設我得佛，光明有限量，下至不照百千億那由他諸佛國者，不取正覺。

第十三願、壽命無量

設我得佛，壽命有限量，下至百千億那由他劫者，不取正覺。

第十四願、聲聞無數

設我得佛，國中聲聞，有能計量，乃至三千大千世界眾生，悉成緣覺，於百千劫，悉共計校，知其數者，不取正覺。

第十五願、隨願修短

設我得佛，國中天人，壽命無能限量，除其本願，修短自在。若不爾者，不取正覺。

第十六願、不聞惡名

設我得佛，國中天人，乃至聞有不善名者，不取正覺。

第十七願、諸佛稱歎

設我得佛，十方世界無量諸佛，不悉咨嗟稱我名者，不取正覺。

第十八願、十念必生

設我得佛，十方眾生，至心信樂，欲生我國，乃至十念，若不生者，不取正覺。唯除五逆，誹謗正法。

第十九願、臨終接引

設我得佛，十方眾生，發菩提心，修諸功德，至心發願，欲生我國，臨壽終時，假令不與大眾圍繞，現其人前者，不取正覺。

第二十願、欲生果遂

設我得佛，十方眾生，聞我名號，繫念我國，植眾德本，至心迴向，欲生我國，不果遂者，不取正覺。

第二十一願、三十二相

設我得佛，國中天人，不悉成滿三十二大人相者，不取正覺。

第二十二願、一生補處

設我得佛，他方佛土諸菩薩眾，來生我國，究竟必至一生補處。除其本願自在所化。為眾生故，被弘誓鎧，積累德本，度脫一切。遊諸佛國，修菩薩行，供養十方諸佛如來。開化恆沙無量眾生，使立無上正真之道，超出常倫諸地之行，現前修習普賢之德。若不爾者，不取正覺。

第二十三願、供養諸佛

設我得佛，國中菩薩，承佛神力，供養諸佛，一食之頃，不能徧至無數無量億那由他諸佛國者，不取正覺。

第二十四願、供具隨意

設我得佛，國中菩薩，在諸佛前，現其德本，諸所求欲供養之具，若不如意者，不取正覺。

第二十五願、演說妙智

設我得佛，國中菩薩，不能演說一切智者，不取正覺。

第二十六願、那羅延身

設我得佛，國中菩薩，不得金剛那羅延身者，不取正覺。

第二十七願、一切嚴淨

設我得佛，國中天人，一切萬物，嚴淨光麗，形色殊特，窮微極妙，無能稱量。其諸眾生，乃至逮得天眼，有能明了，辨其名數者，不取正覺。

第二十八願、道樹高顯

設我得佛，國中菩薩，乃至少功德者，不能知見其道場樹無量光色，高四百萬里者，不取正覺。

第二十九願、誦經得慧

設我得佛，國中菩薩，若受讀經法，諷誦持說，而不得辯才智慧者，不取正覺。

第三十願、慧辯無限

設我得佛，國中菩薩，智慧辯才，若可限量者，不取正覺。

第三十一願、照見十方

設我得佛，國土清淨，皆悉照見十方一切無量無數不可思議諸佛世界，猶如明鏡，覩其面像。若不爾者，不取正覺。

第三十二願、寶香妙嚴

設我得佛，自地以上，至於虛空，宮殿樓觀，池流華樹，國土所有一切萬物，皆以無量雜寶百千種香而共合成。嚴飾奇妙，超諸天人。其香普薰十方世界。菩薩聞者，皆修佛行。若不爾者，不取正覺。

第三十三願、蒙光柔軟

設我得佛，十方無量不可思議諸佛世界眾生之類，蒙我光明觸其身者，身心柔軟，超過天人。若不爾者，不取正覺。

第三十四願、聞名得忍

設我得佛，十方無量不可思議諸佛世界眾生之類，聞我名字，不得菩薩無生法忍，諸深總持者，不取正覺。

第三十五願、脫離女身

設我得佛，十方無量不可思議諸佛世界，其有女人，聞我名字，歡喜信樂，發菩提心，厭惡女身，壽終之後，復為女像者，不取正覺。

第三十六願、常修梵行

設我得佛，十方無量不可思議諸佛世界諸菩薩眾，聞我名字，壽終之後，常修梵行，至成佛道。若不爾者，不取正覺。

第三十七願、天人致敬

設我得佛，十方無量不可思議諸佛世界諸天人民，聞我名字，五體投地，稽首作禮，歡喜信樂，修菩薩行，諸天世人，莫不致敬。若不爾者，不取正覺。

第三十八願、衣服隨念

設我得佛，國中天人，欲得衣服，隨念即至，如佛所讚應法妙服，自然在身。有求裁縫擣染浣濯者，不取正覺。

第三十九願、樂如漏盡

設我得佛，國中天人，所受快樂，不如漏盡比丘者，不取正覺。

第四十願、樹中現刹

設我得佛，國中菩薩，隨意欲見十方無量嚴淨佛土，應時如願，於寶樹中，皆悉照見，猶如明鏡，覩其面像。若不爾者，不取正覺。

第四十一願、諸根無缺

設我得佛，他方國土諸菩薩眾，聞我名字，至於得佛，諸根缺陋不具足者，不取正覺。

第四十二願、清淨解脫

設我得佛，他方國土諸菩薩眾，聞我名字，皆悉逮得清淨解脫三昧，住是三昧，一發意頃，供養無量不可思議諸佛世尊，而不失定意。若不爾者，不取正覺。

第四十三願、聞名得福

設我得佛，他方國土諸菩薩眾，聞我名字，壽終之後，生尊貴家。若不爾者，不取正覺。

第四十四願、修行具德

設我得佛，他方國土諸菩薩眾，聞我名字，歡喜踊躍，修菩薩行，具足德本。若不爾者，不取正覺。

第四十五願、普等三昧

設我得佛，他方國土諸菩薩眾，聞我名字，皆悉逮得普等三昧。住是三昧，至於成佛，常見無量不可思議一切諸佛。若不爾者，不取正覺。

第四十六願、隨願聞法

設我得佛，國中菩薩，隨其志願所欲聞法，自然得聞。若不爾者，不取正覺。

第四十七願、聞名不退

設我得佛，他方國土諸菩薩眾，聞我名字，不即得至不退轉者，不取正覺。

第四十八願、得三法忍

設我得佛，他方國土諸菩薩眾，聞我名字，不即得至第一忍，第二第三法忍，於諸佛法，不能即得不退轉者，不取正覺。

庚四、立誓自要（分三：辛一、自要。辛二、順求。辛三、請證）

辛一、自要（壬一、約佛自德自要。壬二、約佛化德自要）

壬一、約佛自德自要

佛告阿難：爾時，法藏比丘說此願已，以偈頌曰：

我建超世願，必至無上道，斯願不滿足，誓不成等覺。

壬二、約佛化德自要

我於無量劫，不為大施主，普濟諸貧苦，誓不成等覺。

我至成佛道，名聲超十方，究竟有不聞，誓不成等覺。

辛二、順求

離欲深正念，淨慧修梵行，志求無上尊，為諸天人師。

神力演大光，普照無際土，消除三垢冥，明濟眾厄難。

開彼智慧眼，滅此昏盲暗，閉塞諸惡道，通達善趣門。

功祚成滿足，威曜朗十方，日月戢重暉，天光隱不現。

為眾開法藏，廣施功德寶，常於大眾中，說法師子吼。

供養一切佛，具足眾德本，願慧悉成滿，得為三界雄。

如佛無礙智，通達靡不照，願我功德力，等此最勝尊。

### 辛三、請證

斯願若剋果，大千應感動，虛空諸天神，當雨珍妙華。

### 庚五、現瑞記歎

佛語阿難：法藏比丘說此頌已，應時普地六種震動，天雨妙華，以散其上。自然音樂，空中讚言：決定必成無上正覺。

庚六、總以結歎

於是法藏比丘，具足修滿如是大願，誠諦不虛，超出世間，深樂寂滅。

己三、廣前所行（分二：庚一、明修具。庚二、彰報勝）

庚一、明修具（分二：辛一、修淨土行。辛二、修法身行）

辛一、修淨土行

阿難！法藏比丘於其佛所，諸天魔梵龍神八部眾之中，發斯弘誓，建此願已，一向專志莊嚴妙土。

所修佛國，開廓廣大，超勝獨妙，建立常然，無衰無變。於不可思議兆載永劫，積植菩薩無量德行。

辛二、修法身行（分二：壬一、別明身因。壬二、總以結之）

壬一、別明身因（分四：癸一、明離煩惱。癸二、明修善法。癸三、離惡修善。癸四、重明修善）

癸一、明離煩惱（分四：子一、施戒圓淨。子二、忍進成就。子三、定慧具足。子四、三業無過）

子一、施戒圓淨

不生欲覺、瞋覺、害覺，不起欲想、瞋想、害想，不著色、聲、香、味、觸、法。

子二、忍進成就

忍力成就。不計眾苦，少欲知足。

子三、定慧具足

無染恚癡，三昧常寂，智慧無礙。

子四、三業無過

無有虛偽、詭曲之心。和顏愛語，先意承問。

癸二、明修善法（分三：子一、誨人不倦。子二、修福。

子三、修慧）

子一、誨人不倦

勇猛精進，志願無倦。專求清白之法，以惠利群生。

子二、修福

恭敬三寶，奉事師長。以大莊嚴具足眾行，令諸眾生功德成就。

子三、修慧

住空、無相、無願之法，無作無起，觀法如化。

癸三、離惡修善（分二：子一、離惡。子二、修善）

子一、離惡

遠離麤言，自害害彼，彼此俱害。

子二、修善

修習善語，自利利人，人我兼利。

癸四、重明修善

棄國捐王，絕去財色，自行六波羅密，教人令行。

壬二、總以結之

無央數劫，積功累德。

庚二、彰報勝（分二：辛一、依報殊勝。辛二、正報殊勝）

辛一、依報殊勝

隨其生處，在意所欲，無量寶藏自然發應。教化安立無數眾生，住於無上正真之道。

辛二、正報殊勝（分二：壬一、福德殊勝。壬二、智慧殊勝）

壬一、福德殊勝

或為長者居士豪姓尊貴，或為刹利國君轉輪聖帝，或為六欲天主乃至梵王。常以四事，供養恭敬一切諸佛，如是功德不可稱說。口氣香潔如優鉢羅華。身諸毛孔，出栴檀香，其香普熏無量世界。容色端正，相好殊妙。其手常出無盡之寶，衣服飲食、珍妙華香、繒蓋幢幡莊嚴之具，如是等事，超諸人天。

壬二、智慧殊勝

於一切法，而得自在。

乙二、明其所成（分二：丙一、略明所成。丙二、廣明所成）

丙一、略明所成（分二：丁一、法藏成佛。丁二、佛土寶嚴）

丁一、法藏成佛（分三：戊一、所成佛身。戊二、所成佛土。戊三、何時成佛）

戊一、所成佛身（分二：己一、阿難申問。己二、釋尊略答）

己一、阿難申問

阿難白佛：法藏菩薩，為已成佛而取滅度？為未成佛？為今現在？

己二、釋尊略答

佛告阿難：法藏菩薩，今已成佛，現在西方，去此十萬億剎。

戊二、所成佛土

其佛世界，名曰安樂。

戊三、何時成佛

阿難又問：其佛成道已來，為經幾時？佛言：成佛已來，凡歷十劫。

丁二、佛土寶嚴（分二：戊一、先明彼土所有。戊二、次明彼土所無）

戊一、先明彼土所有（分三：己一、明體質相。己二、明無量相）

己三、明莊嚴相）

己一、明體質相

其佛國土，自然七寶，金、銀、琉璃、珊瑚、琥珀、碑礫、瑪瑙合成為地。

己二、明無量相

恢廓曠蕩，不可限極，悉相雜廁，轉相間入。

己三、明莊嚴相

光赫煌爍，微妙奇麗，清淨莊嚴，超踰十方一切世界眾寶中精，其寶猶如第六天寶。

戊一、次明彼土所無（分二：己一、總申所無。己二、辨無所以）

己一、總申所無

又其國土，無須彌山，及金剛圍一切諸山，亦無大海、小海、溪渠、井谷，佛神力故，欲見則見。亦無地獄、餓鬼、畜生諸難之趣。亦無四時春秋冬夏，不寒不熱，常和調適。

己二、辨無所以

爾時，阿難白佛言：世尊，若彼國土，無須彌山，其四天王及忉利天，依何而住？佛語阿難：第三炎天，乃至色究竟天，皆依何住？阿難白佛：行業果報，不可思議。佛語阿難：行業果報不可思議，諸佛世界亦不可思議，其諸眾生功德善力，住行業之地，故能爾耳。阿難白佛：我不疑此法，但為將來眾生，欲除其疑惑，故問斯義。

丙二、廣明所成（分四：丁一、明佛正報莊嚴。丁二、彰明聖眾無量。丁三、佛土依報莊嚴。

丁四、重明依正殊勝）

丁一、明佛正報莊嚴（分二：戊一、光明無量。戊二、壽命無量）

戊一、光明無量（分五：己一、釋尊讚歎。己二、見聞獲益。己三、諸聖共歎。己四、重明聞光利益。

己五、結歎）

己一、釋尊讚歎（分二：庚一、較量歎勝。庚二、結歎顯勝）

庚一、較量歎勝

佛告阿難：無量壽佛，威神光明，最尊第一，諸佛光明所不能及。或照百佛世界，或千佛世界，取要言之，乃照東方恆沙佛剎。南西北方，四維上下，亦復如是。或有佛光照於七尺，或一由旬，二三四五由旬，如是轉倍，乃至照一佛剎。

庚二、結歎顯勝

是故無量壽佛，號無量光佛、無邊光佛、無礙光佛、無對光佛、炎王光佛、清淨光佛、歡喜光佛、智慧光佛、不斷光佛、難思光佛、無稱光佛、超日月光佛。

〔乙〕二、見聞獲益（分三：庚一、滅惡益。庚二、生善益。庚三、離苦得樂益）

庚一、滅惡益

其有眾生，遇斯光者，三垢消滅。

庚二、生善益

身意柔軟，歡喜踊躍，善心生焉。

庚三、離苦得樂益

若在三塗極苦之處，見此光明，皆得休息，無復苦惱，壽終之後，皆蒙解脫。

己三、諸聖共歎

無量壽佛，光明顯赫，照曜十方，諸佛國土，莫不聞焉。不但我今稱其光明，一切諸佛、聲聞、緣覺、諸菩薩眾咸共歎譽，亦復如是。

己四、重明聞光利益（分二：庚一、稱說得隨願往生益。庚二、往生得如佛光明益）

庚一、稱說得隨願往生益

若有眾生，聞其光明威神功德，日夜稱說，至心不斷，隨意所願，得生其國。

庚二、往生得如佛光明益

為諸菩薩、聲聞之眾，所共歎譽，稱其功德。至其最後得佛道時，普為十方諸佛菩薩，歎其光明，亦如今也。

己五、結歎

佛言：我說無量壽佛光明威神，巍巍殊妙，晝夜一劫，尚未能盡。

戊二、壽命無量（己一、約佛壽命。己二、約眾生壽命）

己一、約佛壽命

佛語阿難：又無量壽佛，壽命長久，不可稱計，汝寧知乎？假使十方世界無量眾生皆得人身，悉令成就聲聞、緣覺，都共集會禪思一心，竭其智力，於百千萬劫悉共推算，計其壽命長遠之數，不能窮盡，知其限極。

己二、約眾生壽命

聲聞菩薩，天人之眾，壽命長短，亦復如是，非算數譬喻所能知也。

丁二、彰明聖眾無量（分三：戊一、明數無量。戊二、明德殊勝。戊三、重顯眾多）

戊一、明數無量

又聲聞菩薩，其數難量，不可稱說。

戊二、明德殊勝

神智洞達，威力自在，能於掌中，持一切世界。

戊三、重顯眾多

佛語阿難：彼佛初會，聲聞眾數不可稱計，菩薩亦然。如大目犍連，百千萬億無量無數，於阿僧祇那由他劫，乃至滅度，悉共計校，不能究了多少之數。譬如大海深廣無量，假使有人析其一毛，以為百分，以一分毛沾取一滴，於意云何？其所滯者，於彼大海，何所為多？阿難白佛：彼所滯水，比於大海，多少之量，非巧歷算數言辭譬類所能知也。佛語阿難：如目連等，於百千萬億那由他劫，計彼初會聲聞、菩薩，所知數者，猶如一滴，其所不知，如大海水。

丁三、佛土依報莊嚴（分五：戊一、七寶諸樹。戊二、道場寶樹。戊三、樂聲演法。戊四、堂舍樓觀。

戊五、七寶浴池）

戊一、七寶諸樹（分二：己一、明樹體相。己二、明樹功用）

己一、明樹體相（分三：庚一、純寶樹。庚二、雜寶樹。庚三、總歎）

庚一、純寶樹

又其國土，七寶諸樹，周滿世界，金樹、銀樹、琉璃樹、玻璃樹、珊瑚樹、瑪瑙樹、碑礫之樹。

庚二、雜寶樹

或有二寶、三寶，乃至七寶，轉共合成；或有金樹，銀葉華果；或有銀樹，金葉華果；或琉璃樹，玻  
璃為葉，華果亦然；或水精樹，琉璃為葉，華果亦然；或珊瑚樹，瑪瑙為葉，華果亦然；或瑪瑙樹，  
琉璃為葉，華果亦然；或碑礫樹，眾寶為葉，華果亦然。或有寶樹，紫金為本，白銀為莖，琉璃為枝，  
水精為條，珊瑚為葉，瑪瑙為華，碑礫為實；或有寶樹，白銀為本，琉璃為莖，水精為枝，珊瑚為條，  
瑪瑙為葉，碑礫為華，紫金為實；或有寶樹，琉璃為本，水精為莖，珊瑚為枝，瑪瑙為條，碑礫為葉，  
紫金為華，白銀為實；或有寶樹，水精為本，珊瑚為莖，瑪瑙為枝、碑礫為條，紫金為葉，白銀為華、  
琉璃為實；或有寶樹，珊瑚為本，瑪瑙為莖，碑礫為枝，紫金為條，白銀為葉，琉璃為華，水精為實；  
或有寶樹，瑪瑙為本，碑礫為莖，紫金為枝，白銀為條，琉璃為葉，水精為華，珊瑚為實；或有寶樹，  
碑礫為本，紫金為莖，白銀為枝，琉璃為條，水精為葉，珊瑚為華，瑪瑙為實。

### 庚三、總歎

行行相值，莖莖相望，枝枝相準，葉葉相向，華華相順，實實相當，榮色光曜，不可勝視。

### 己三、明樹功用

清風時發，出五音聲，微妙宮商，自然相和。

戊一、道場寶樹（分二：己一、明樹體量莊嚴。己二、明寶樹功用）

己一、明樹體量莊嚴（分二：庚一、明樹體量。庚二、明樹莊嚴）

庚一、明樹體量

又無量壽佛，其道場樹，高四百萬里，其本周圍五千由旬，枝葉四布二十萬里，一切眾寶自然合成。

庚二、明樹莊嚴

以月光摩尼持海輪寶，眾寶之王，而莊嚴之。周匝條間，垂寶瓔珞，百千萬色，種種異變，無量光炎，照曜無極。珍妙寶網，羅覆其上，一切莊嚴，隨應而現。

己二、明寶樹功用

微風徐動，吹諸寶樹，演出無量妙法音聲。其聲流布，徧諸佛國。聞其音者，得深法忍，住不退轉，至成佛道，耳根清徹，不遭苦患。目覩其色，鼻知其香，口嘗其味，身觸其光，心以法緣，皆得甚深法忍，住不退轉，至成佛道，六根清徹，無諸惱患。阿難，若彼國土天人，見此樹者，得三法忍：一

者音響忍，二者柔順忍，三者無生法忍。此皆無量壽佛威神力故，本願力故，滿足願故，明了願故，堅固願故，究竟願故。

戊三、樂聲演法（分二：己一、樹出妙聲。己二、樂聲說法）

己一、樹出妙聲

佛告阿難：世間帝王有百千音樂，自轉輪聖王，乃至第六天上，伎樂音聲，展轉相勝千億萬倍。第六天上萬種樂音，不如無量壽國諸七寶樹一種音聲千億倍也。

己二、樂聲說法

亦有自然萬種伎樂。又其樂聲，無非法音。清暢哀亮，微妙和雅，十方世界音聲之中，最為第一。

戊四、堂舍樓觀（分二：己一、明體質相。己二、明莊嚴相）

己一、明體質相

其講堂、精舍、宮殿、樓觀，皆七寶莊嚴，自然化成。

己一、明莊嚴相

復以真珠、明月、摩尼眾寶，以爲交絡，覆蓋其上。

戊五、七寶浴池（分五：己一、明池量相。己二、明水性相。己三、明池體相。己四、明莊嚴相。

己五、池水功用）

己一、明池量相

內外左右，有諸浴池，或十由旬，或二十三十，乃至百千由旬；縱廣深淺，皆各一等。

己一、明水性相

八功德水，湛然盈滿，清淨香潔，味如甘露。

己三、明池體相

黃金池者，底白銀沙；白銀池者，底黃金沙；水精池者，底琉璃沙；琉璃池者，底水精沙；珊瑚池者，底琥珀沙；琥珀池者，底珊瑚沙；碑礫池者，底瑪瑙沙；瑪瑙池者，底碑礫沙；白玉池者，底紫金沙；紫金池者，底白玉沙；或有二寶三寶，乃至七寶，轉共合成。

己四、明莊嚴相

其池岸上，有栴檀樹，華葉垂布，香氣普熏。天優鉢羅華、鉢曇摩華、拘牟頭華、分陀利華，雜色光茂，彌覆水上。

己五、池水功用（分四：庚一、資用隨意。庚二、波出妙聲。庚三、能生善樂。庚四、結歎）

庚一、資用隨意

彼諸菩薩，及聲聞眾，若入寶池，意欲令水沒足，水即沒足；欲令至膝，即至於膝；欲令至腰，水即至腰；欲令至頸，水即至頸；欲令灌身，自然灌身；欲令還復，水輒還復。調和冷暖，自然隨意，開神悅體，蕩除心垢，清明澄潔，淨若無形。寶沙映徹，無深不照。微瀾迴流，轉相灌注。安詳徐逝，不遲不疾。

庚二、波出妙聲

波揚無量自然妙聲，隨其所應，莫不聞者。或聞佛聲，或聞法聲，或聞僧聲，或寂靜聲、空無我聲、大慈悲聲、波羅蜜聲，或十力無畏不共法聲、諸通慧聲、無所作聲、不起滅聲、無生忍聲，乃至甘露灌頂眾妙法聲。如是等聲，稱其所聞，歡喜無量。

庚三、能生善樂

隨順清淨離欲寂滅真實之義，隨順三寶力無所畏不共之法，隨順通慧菩薩聲聞所行之道。

庚四、結歎

無有三塗苦難之名，但有自然快樂之音，是故其國，名曰安樂。

丁四、重明依正殊勝（戊一、新往者正報微妙。

戊二、明佛國依報殊勝。

戊三、舊住者正報微妙。

戊四、重明其依報殊勝）

戊一、新往者正報微妙

阿難，彼佛國土，諸往生者，具足如是清淨色身，諸妙音聲，神通功德。

戊二、明佛國依報殊勝

所處宮殿，衣服飲食，眾妙華香，莊嚴之具，猶第六天自然之物。若欲食時，七寶鉢器自然在前。金、銀、琉璃、碑礫、瑪瑙、珊瑚、琥珀、明月、真珠，如是眾鉢，隨意而至。百味飲食，自然盈滿。雖有此食，實無食者，但見色聞香，意以為食，自然飽足。身心柔軟，無所味著，事已化去，時至復現。彼佛國土清淨安隱，微妙快樂，次於無為泥洹之道。

戊三、舊住者正報微妙（分二：己一、色身微妙。己二、校量顯勝）

己一、色身微妙

其諸聲聞菩薩天人，智慧高明，神通洞達，咸同一類，形無異狀，但因順餘方，故有天人之名。顏貌端正，超世希有，容色微妙，非天非人，皆受自然虛無之身，無極之體。

佛告阿難：譬如世間貧窮乞人，在帝王邊，形貌容狀，寧可類乎？阿難白佛：假令此人在帝王邊，羸陋醜惡，無以為喻，百千萬億不可計倍。所以然者，貧窮乞人，底極斯下，衣不蔽形，食趣支命，飢寒困苦，人理殆盡。皆坐前世不植德本，積財不施，富有益慳，但欲唐得，貪求無厭。不信修善，犯惡山積。如是壽終，財寶消散。苦身聚積，為之憂惱，於己無益，徒為他有。無善可怙，無德可恃，是故死墮惡趣，受此長苦。罪畢得出，生為下賤，愚鄙斯極，示同人類。所以世間帝王，人中獨尊，皆由宿世積德所致；慈惠博施，仁愛兼濟，履信修善，無所違爭，是以壽終福應，得升善道。上生天上，享茲福樂。積善餘慶，今得為人，乃生王家，自然尊貴，儀容端正，眾所敬事。妙衣珍饈，隨心服御，宿福所追，故能致此。佛告阿難：汝言是也。計如帝王，雖人中尊貴，形色端正，比之轉輪聖王，甚為鄙陋，猶彼乞人在帝王邊也。轉輪聖王，威相殊妙，天下第一，比之忉利天王，又復醜惡，不得相喻萬億倍也。假令天帝比第六天王，百千億倍不相類也。設第六天王，比無量壽佛國菩薩聲聞，光顏容色，不相及逮，百千萬億不可計倍。

戊四、重明其依報殊勝（分五：己一、資具稱心。己二、地上莊嚴。

己三、虛空莊嚴。己四、散花莊嚴。

己五、華光出佛）

己一、資具稱心

佛告阿難：無量壽國，其諸天人，衣服、飲食，華香、瓔珞，繒蓋、幢旛、微妙音聲，所居舍宅、宮殿、樓閣，稱其形色，高下大小，或一寶二寶，乃至無量眾寶，隨意所欲，應念即至。

己二、地上莊嚴

又以眾寶妙衣，徧布其地，一切天人，踐之而行。

己三、虛空莊嚴

無量寶網，彌覆佛土，皆以金縷真珠，百千雜寶，奇妙珍異，莊嚴校飾。周匝四面，垂以寶鈴，光色晃曜，盡極嚴麗，自然德風，徐起微動。其風調和，不寒不暑，溫涼柔軟，不遲不疾。吹諸羅網，及

眾寶樹，演發無量微妙法音，流布萬種溫雅德香。其有聞者，塵勞垢習，自然不起。風觸其身，皆得快樂，譬如比丘得滅盡三昧。

己四、散花莊嚴

又風吹散華，徧滿佛土，隨色次第，而不雜亂，柔軟光澤，馨香芬烈。足履其上，踏下四寸，隨舉足已，還復如故。華用已訖，地輒開裂，以次化沒，清淨無遺。隨其時節，風吹散華，如是六反。

己五、華光出佛（分五：庚一、明華數量。庚二、明華形色。庚三、明華放光。庚四、光中出佛。

庚五、化佛度生）

庚一、明華數量

又眾寶蓮華，周滿世界。

庚二、明華形色

一一寶華，百千億葉，其華光明，無量種色，青色青光、白色白光，玄黃朱紫，光色赫然，煥爛煥爛，明曜日月。

庚三、明華放光

一一華中，出三十六百千億光。

庚四、光中出佛

一一光中，出三十六百千億佛，身色紫金，相好殊特。

庚五、化佛度生

一一諸佛，又放百千光明，普為十方說微妙法。如是諸佛，各各安立無量眾生於佛正道。

# 《佛說無量壽經》

## 卷下

乙三、明其所攝（分二：丙一、攝受眾生同歸極樂。丙二、較量勝劣勸修往生。丙三、教見彌陀示當明信。）

丙四、明信佛智誠勿生疑。丙五、正示十方菩薩往生）

丙一、攝受眾生同歸極樂（分二：丁一、三輩往生。丁二、十方稱歎）

丁一、三輩往生（分二：戊一、佛國攝眾總示。戊二、正明三輩往生）

戊一、佛國攝眾總示（分三：己一、眾皆正定。己二、諸佛共讚。三、往生正因）

己一、眾皆正定

佛告阿難：其有眾生，生彼國者，皆悉住於正定之聚。所以者何？彼佛國中，無諸邪聚，及不定聚。

己二、諸佛共讚

十方恆沙諸佛如來，皆共讚歎，無量壽佛威神功德不可思議。

己三、往生正因

諸有眾生，聞其名號，信心歡喜，乃至一念，至心迴向，願生彼國，即得往生，住不退轉。唯除五逆，誹謗正法。

戊二、正明三輩往生（分四：己一、總舉三輩。己二、別明上輩。己三、別明中輩。己四、別明下輩）

己一、總舉三輩

佛告阿難：十方世界諸天人民，其有至心願生彼國，凡有三輩。

己二、別明上輩（分三：庚一、修因。庚二、得果。庚三、勸修）

庚一、修因

其上輩者，捨家棄欲，而作沙門，發菩提心，一向專念無量壽佛，修諸功德，願生彼國。

庚二、得果

此等眾生，臨壽終時，無量壽佛，與諸大眾，現其人前，即隨彼佛，往生其國，便於七寶華中，自然化生，住不退轉，智慧勇猛，神通自在。

庚三、勸修

是故，阿難！其有眾生，欲於今世見無量壽佛，應發無上菩提之心，修行功德，願生彼國。

己三、別明中輩（分三：庚一、修因。庚二、得果。庚三、較量）

庚一、修因

佛語阿難：其中輩者，十方世界諸天人民，其有至心，願生彼國，雖不能行作沙門，大修功德，當發無上菩提之心，一向專念無量壽佛，多少修善，奉持齋戒，起立塔像，飯食沙門，懸繒燃燈，散華燒香，以此迴向，願生彼國。

庚二、得果

其人臨終，無量壽佛，化現其身，光明相好，具如真佛，與諸大眾，現其人前。即隨化佛往生其國，住不退轉。

庚三、較量

功德智慧，次如上輩者也。

己四、別明下輩（分三：庚一、修因。庚二、得果。庚三、較量）

庚一、修因

佛語阿難：其下輩者，十方世界諸天人民，其有至心，欲生彼國，假使不能作諸功德，當發無上菩提之心，一向專意，乃至十念，念無量壽佛，願生其國。若聞深法，歡喜信樂，不生疑惑，乃至一念，念於彼佛，以至誠心，願生其國。

庚二、得果

此人臨終，夢見彼佛，亦得往生。

庚三、較量

功德智慧，次如中輩者也。

丁二、十方稱歎（分二：戊一、長行。戊二、偈頌）

戊一、長行（分二：己一、諸佛稱歎彌陀。己二、菩薩同生供養）

己一、諸佛稱歎彌陀

佛告阿難：無量壽佛，威神無極。十方世界，無量無邊不可思議諸佛如來，莫不稱歎。

己二、菩薩同生供養

於彼東方恆河沙佛國，無量無數諸菩薩眾，皆悉往詣無量壽佛所，恭敬供養，及諸菩薩聲聞之眾，聽受經法，宣布道化。南西北方，四維上下，亦復如是。

戊二、偈頌（分三：己一、頌菩薩同生。己二、頌彌陀授記。己三、頌諸佛同歎）

己一、頌菩薩同生

爾時世尊，而說頌曰：

東方諸佛國，其數如恆沙，彼土菩薩眾，往觀無量覺。

南西北四維，上下亦復然，彼土菩薩眾，往觀無量覺。

一切諸菩薩，各齋天妙華，寶香無價衣，供養無量覺。

咸然奏天樂，暢發和雅音，歌歎最勝尊，供養無量覺。

究達神通慧，遊入深法門，具足功德藏，妙智無等倫，

慧日朗世間，消除生死雲，恭敬遶三匝，稽首無上尊。

見彼嚴淨土，微妙難思議，因發無量心，願我國亦然。

己二、頌彌陀授記

應時無量尊，動容發欣笑，口出無數光，徧照十方國。  
迴光圍繞身，三匝從頂入，一切天人眾，踊躍皆歡喜。

大士觀世音，整服稽首問，白佛何緣笑，唯然願說意。

梵聲猶雷震，八音暢妙響，當授菩薩記，今說仁諦聽。

十方來正士，吾悉知彼願，志求嚴淨土，受決當作佛。

覺了一切法，猶如夢幻響，滿足諸妙願，必成如是剎。

知法如電影，究竟菩薩道，具諸功德本，受決當作佛。

通達諸法性，一切空無我，專求淨佛土，必成如是剎。

己三、頌諸佛同歎（分二：庚一、頌諸佛共歎。庚二、頌釋尊自歎）

庚一、頌諸佛共歎（分二：辛一、勸往。辛二、得益）

辛一、勸往

諸佛告菩薩，今觀安養佛，聞法樂受行，疾得清淨處。

辛二、得益

至彼嚴淨國，便速得神通，必於無量尊，受記成等覺。

其佛本願力，聞名欲往生，皆悉到彼國，自致不退轉。

菩薩興至願，願己國無異，普念度一切，名顯滿十方。

奉事億如來，飛化徧諸刹，恭敬歡喜去，還到安養國。

庚二、頌釋尊自歎（分三：辛一、歎此經難得聞信。辛二、歎佛智甚深廣大。辛三、以理勸聞法精進）

辛一、歎此經難得聞信

若人無善心，不得聞此經，清淨有戒者，乃獲聞正法。

曾更見世尊，則能信此事，謙敬聞奉行，踊躍大歡喜。

憍慢弊懈怠，難以信此法，宿世見諸佛，樂聽如是教。

辛二、歎佛智甚深廣大

聲聞或菩薩，莫能究聖心，譬如從生盲，欲行開導人。  
如來智慧海，深廣無涯底，二乘非所測，唯佛獨明了。  
假使一切人，具足皆得道，淨慧知本空，億劫思佛智。  
窮力極講說，盡壽猶不知，佛慧無邊際，如是致清淨。

辛三、以理勸聞法精進

壽命甚難得，佛世亦難值，人有信慧難，若聞精進求。  
聞法能不忘，見敬得大慶，則我善親友，是故當發意。  
設滿世界火，必過要聞法，會當成佛道，廣度生死流。

丙二、較量勝劣勸修往生（分八：丁一、補處菩薩。丁二、供佛歎德。丁三、彌陀說法。丁四、菩薩修持。

丁五、菩薩功德。丁六、勸修往生。丁七、誠斷五惡。丁八、重重誨勉）

丁一、補處菩薩（分五：戊一、位尊壽永。戊二、身光微妙。戊三、身相具足。戊四、成德殊特。

戊五、永離惡趣）

戊一、位尊壽永

佛告阿難：彼國菩薩，皆當究竟一生補處，除其本願，為眾生故，以弘誓功德，而自莊嚴，普欲度脫一切眾生。

戊二、身光微妙

阿難！彼佛國中，諸聲聞眾，身光一尋。菩薩光明照百由旬。有二菩薩，最尊第一，威神光明，普照三千大千世界。阿難白佛：彼二菩薩，其號云何？佛言：一名觀世音，二名大勢至。此二菩薩，於此國土，修菩薩行，命終轉化，生彼佛國。

戊三、身相具足

阿難！其有眾生，生彼國者，皆悉具足三十二相。

#### 戊四、成德殊特

智慧成滿，深入諸法，究暢要妙，神通無礙，諸根明利。其鈍根者，成就二忍。其利根者，得不可計無生法忍。

#### 戊五、永離惡趣

又彼菩薩，乃至成佛，不受惡趣，神通自在，常識宿命。除生他方五濁惡世，示現同彼，如我國也。

#### 丁二、供佛歎德

佛語阿難：「彼國菩薩，承佛威神，一食之頃，往詣十方無量世界，恭敬供養，諸佛世尊。隨心所念華香、伎樂，衣蓋、幢幡，無數無量供養之具，自然化生，應念即至。珍妙殊特，非世所有，輒以奉散諸佛，及諸菩薩聲聞之眾。在虛空中，化成華蓋，光色昱爍，香氣普熏。其華周圓四百里者，如是

轉倍，乃覆三千大千世界，隨其前後，以次化沒。其諸菩薩僉然欣悅，於虛空中，共奏天樂，以微妙音，歌歎佛德，聽受經法，歡喜無量。供養佛已，未食之前，忽然輕舉，還其本國。

### 丁三、彌陀說法

佛語阿難：無量壽佛，為諸聲聞菩薩天人頒宣法時，都悉集會七寶講堂，廣宣道教，演暢妙法，莫不歡喜，心解得道。即時四方自然風起，吹七寶樹，出五音聲。無量妙華，隨風四散，自然供養，如是不絕。一切諸天，皆齋天上百千華香，萬種伎樂，供養其佛，及諸菩薩聲聞之眾。普散華香，奏諸音樂，前後來往，更相開避。當斯之時，熙怡快樂，不可勝言。

### 丁四、菩薩修持（分二：戊一、說法無違之德。戊二、無我自在之德）

#### 戊一、說法無違之德

佛告阿難：生彼佛國諸菩薩等，所可講說，常宣正法，隨順智慧，無違無失。

#### 戊二、無我自在之德

於其國土，所有萬物，無我所心，無染著心。去來進止，情無所係。隨意自在，無所適莫，無彼無我，無競無訟。

於諸眾生，得大慈悲饒益之心。柔潤調伏，無忿恨心。離蓋清淨，無厭怠心。等心、勝心、深心、定心、愛法樂法喜法之心。滅諸煩惱，離惡趣心。

丁五、菩薩功德（分五：戊一、總歎。戊二、別歎。戊三、喻歎。戊四、合法。戊五、結歎功德無盡）

戊一、總歎

究竟一切菩薩所行，具足成就無量功德。

戊二、別歎（分三：己一、成德圓備。己二、行修具足。己三、成德殊勝）

己一、成德圓備

得深禪定，諸通明慧，遊志七覺，修心佛法。肉眼清徹，靡不分了；天眼通達，無量無限；法眼觀察，究竟諸道；慧眼見真，能度彼岸；佛眼具足，覺了法性。以無礙智，為人演說。

二二、行修具足

等觀三界，空無所有，志求佛法，具諸辯才，除滅眾生煩惱之患。從如來生，解法如如，善知集滅音聲方便。不欣世語，樂在正論。修諸善本，志崇佛道。知一切法，皆悉寂滅。生身煩惱，二餘俱盡。聞甚深法，心不疑懼。常能修行，其大悲者，深遠微妙，靡不覆載。

二三、成德殊勝

究竟一乘，至於彼岸，決斷疑網，慧由心出。於佛教法，該羅無外，智慧如大海，三昧如山王。慧光明淨，超踰日月。清白之法，具足圓滿。

戊三、喻歎

猶如雪山，照諸功德等一淨故；猶如大地，淨穢好惡無異心故；猶如淨水，洗除塵勞諸垢染故；猶如火王，燒滅一切煩惱薪故；猶如大風，行諸世界無障礙故；猶如虛空，於一切有無所著故；猶如蓮華，於諸世間無染污故。

猶如大乘，運載群萌出生死故；猶如重雲，震大法雷覺未覺故；猶如大雨，雨甘露法潤眾生故；如金剛山，眾魔外道不能動故；如梵天王，於諸善法最上首故；如尼拘類樹，普覆一切故；如優曇鉢華，希有難遇故；如金翅鳥，威伏外道故；如眾遊禽，無所藏積故；猶如牛王，無能勝故；猶如象王，善調伏故；如師子王，無所畏故。

曠若虛空，大慈等故。

戊四、合法（分二：己一、自他二利圓滿。己二、自他二利具足）

己一、自他二利圓滿

摧滅嫉心，不忌勝故。專樂求法，心無厭足。常欲廣說，志無疲倦。擊法鼓，建法幢，曜慧日，除癡闇。修六和敬，常行法施，志勇精進，心不退弱。為世燈明，最勝福田。常為師導，等無憎愛，唯樂正道，無餘欣戚。拔諸欲刺，以安群生。功慧殊勝，莫不尊敬。滅三垢障，遊諸神通。

己二、自他二利具足

因力，緣力，意力，願力，方便之力。常力，善力，定力，慧力，多聞之力。施戒忍辱，精進禪定，智慧之力。正念止觀，諸通明力。如法調伏諸眾生力。如是等力，一切具足。

#### 戊五、結歎功德無盡

身色相好，功德辯才，具足莊嚴，無與等者。恭敬供養無量諸佛，常為諸佛所共稱歎。究竟菩薩諸波羅蜜，修空、無相、無願三昧，不生不滅諸三昧門，遠離聲聞緣覺之地。阿難！彼諸菩薩，成就如是無量功德，我但為汝略言之耳。若廣說者，百千萬劫不能窮盡。

丁六、勸修往生（分二：戊一、明彼土依正殊勝以勸欣求。戊二、明此土三毒過患以勸厭捨。）

#### 戊一、明彼土依正殊勝以勸欣求

佛告彌勒菩薩諸天人等：無量壽國，聲聞菩薩，功德智慧不可稱說。又其國土，微妙安樂，清淨若此，何不力為善？念道之自然。著於無上下，洞達無邊際，宜各勤精進，努力自求之。必得超絕去，往生

安樂國，橫截五惡道。惡道自然閉。昇道無窮極，易往而無人，其國不逆違，自然之所牽。何不棄世事？勤行求道德；可獲極長生，壽樂無有極。

戊二、明此土三毒過患以勸厭捨（分四：己一、明貪過。己二、明瞋過。己三、明癡過。己四、結說苦報無盡）

### 己一、明貪過

然世人薄俗，共諍不急之事，於此劇惡極苦之中，勤身營務，以自給濟。無尊無卑，無貧無富，少長男女，共憂錢財，有無同然，憂思適等。屏營愁苦，累念積慮。為心走使，無有安時；有田憂田，有宅憂宅；牛馬、六畜、奴婢、錢財、衣食什物，復共憂之。重思累息，憂念愁怖。橫為非常水火、盜賊、怨家、債主，焚漂劫奪，消散磨滅，憂毒忪忪，無有解時。結憤心中，不離憂惱。心堅意固，適無縱捨。或坐摧碎，身亡命終，棄捐之去，莫誰隨者。尊貴豪富，亦有斯患，憂懼萬端，勤苦若此，結眾寒熱，與痛共居。貧窮下劣，困乏常無。無田亦憂欲有田，無宅亦憂欲有宅，無牛、馬、六畜、奴婢、錢財、衣食什物，亦憂欲有之。適有一，復少一，有是少是，思有齊等。適欲具有，便復糜散。如是憂苦，當復求索，不能時得，思想無益。身心俱勞，坐起不安，憂念相隨，勤苦若此，亦結眾寒

熱，與痛共居。或時坐之終身夭命，不肯為善，行道進德。壽終身死，當獨遠去，有所趣向，善惡之道，莫能知者。

### 己一、明瞋過

世間人民，父子兄弟，夫婦家室，中外親屬，當相敬愛，無相憎嫉。有無相通，無得貪惜，言色常和，莫相違戾。或時心諍，有所恚怒，今世恨意，微相憎嫉，後世轉劇，至成大怨。所以者何？世間之事，更相患害，雖不即時，應急相破。然含毒畜怒，結憤精神，自然剋識，不得相離，皆當對生，更相報復。人在世間，愛欲之中，獨生獨死，獨去獨來。當行至趣苦樂之地，身自當之，無有代者。善惡變化，殃福異處，宿豫嚴待，當獨趣入，遠到他所，莫能見者。善惡自然，追行所生，窈窈冥冥，別離久長，道路不同，會見無期，甚難甚難。今得相值，何不棄眾事，各遇強健時，努力勤修善，精進願度世，可得極長生。如何不求道，安所須待，欲何樂乎？

### 己三、明癡過（分二：庚一、明癡相。庚二、明癡過）

庚一、明癡相（分三：辛一、不信因果。辛二、不遇善友。辛三、不信經法）

辛一、不信因果

如是世人，不信作善得善，為道得道；不信人死更生，惠施得福。善惡之事，都不信之，謂之不然，終無有是。但坐此故，且自見之，更相瞻視，先後同然。

辛二、不遇善友

轉相承受，父餘教令，先人祖父，素不為善，不識道德，身愚神闇，心塞意閉。死生之趣，善惡之道，自不能見，無有語者。吉凶禍福，競各作之，無一怪也。

辛三、不信經法

生死常道，轉相嗣立，或父哭子，或子哭父，兄弟夫婦，更相哭泣。顛倒上下，無常根本，皆當過去，不可常保。教語開導，信之者少，是以生死流轉，無有休止。如此之人，矇冥抵突，不信經法，心無遠慮，各欲快意。

庚二、明癡過（分二：辛一、總明。辛二、別明）

辛一、總明

癡惑於愛欲，不達於道德，迷沒於瞋怒，貪狼於財色。

辛一、別明（分三：壬一、癡所生過。壬二、癡起貪過。壬三、癡起瞋過）

壬一、癡所生過

坐之不得道，當更惡趣苦，生死無窮已，哀哉甚可傷。或時室家父子，兄弟夫婦，一死一生，更相哀

愍。恩愛思慕，憂念結縛，心意痛著，迭相顧戀，窮日卒歲，無有解已。教語道德，心不開明，思想  
恩好，不離情欲。昏蒙闇塞，愚惑所覆，不能深思熟計，心自端正，專精行道，決斷世事。便旋至竟，  
年壽終盡，不能得道，無可奈何。

壬一、癡起貪過

總猥憒擾，皆貪愛欲。惑道者眾，悟之者少，世間忽忽，無可聊賴。

壬三、癡起瞋過

尊卑上下，貧富貴賤，勤苦忽務，各懷殺毒。惡氣窈冥，為妄興事。違逆天地，不從人心。自然非惡，先隨與之，恣聽所為。待其罪極，其壽未終，便頓奪之。

#### 己四、結說苦報無盡

下入惡道，累世勤苦，展轉其中，數千億劫，無有出期。痛不可言，甚可哀愍。

戊三、特勸眾生離惡修善求往生（分四：己一、正勸修捨。己二、彌勒領解。己三、重勸修捨。己四、彌勒領行）

#### 己一、正勸修捨

佛告彌勒菩薩，諸天人等：我今語汝，世間之事，人用是故，坐不得道。當熟思計，遠離眾惡。擇其善者，勤而行之。愛欲榮華，不可常保，皆當別離，無可樂者。遇佛在世，當勤精進。其有至願生安樂國者，可得智慧明達，功德殊勝。勿得隨心所欲，虧負經戒，在人後也。儻有疑意，不解經者，可具問佛，當為說之。

#### 己二、彌勒領解

彌勒菩薩長跪白言：佛威神尊重，所說快善。聽佛經語，貫心思之，世人實爾，如佛所言。今佛慈愍，顯示大道，耳目開明，長得度脫，聞佛所說，莫不歡喜。諸天人民蟄動之類，皆蒙慈恩，解脫憂苦。佛教戒，甚深甚善，智慧明見，八方上下去來今事，莫不究竟。今我眾等，所以蒙得度脫，皆佛前世求道之時，謙苦所致。恩德普覆，福祿巍巍，光明徹照，達空無極，開入泥洹。教授典攬，威制消化。感動十方，無窮無極。佛為法王，尊超眾聖，普為一切天人之師，隨心所願，皆令得道。今得值佛，復聞無量壽聲，靡不歡喜，心得開明。

己三、重勸修捨（分四：庚一、歎領荷佛恩。庚二、慶值佛聞法。庚三、明正勸修行。庚四、明勸捨疑惑）

庚一、歎領荷佛恩

佛告彌勒：汝言是也。若有恭敬於佛者，實為大善。天下久久，乃復有佛。今我於此世作佛，演說經法，宣布道教，斷諸疑網，拔愛欲之本，杜眾惡之源。遊步三界，無所罣礙。典攬智慧，眾道之要，執持綱維，昭然分明。開示五趣，度未度者，決正生死泥洹之道。

庚二、慶值佛聞法

彌勒當知，汝從無數劫來，修菩薩行，欲度眾生，其已久遠。從汝得道，至於泥洹不可稱數。汝及十方諸天人民一切四眾，永劫已來，展轉五道，憂畏勤苦，不可具言，乃至今世，生死不絕，與佛相值，聽受經法，又復得聞無量壽佛，快哉甚善！吾助爾喜。

庚三、明正勸修行

汝今亦可自厭生死老病痛苦，惡露不淨，無可樂者。宜自決斷，端身正行，益作諸善。修己潔體，洗除心垢。言行忠信，表裏相應。人能自度，轉相拯濟，精明求願，積累善本。雖一世勤苦，須臾之間，後生無量壽國，快樂無極。長與道德合明，永拔生死根本，無復貪恚愚癡，苦惱之患。欲壽一劫、百劫、千億萬劫，自在隨意，皆可得之。無為自然，次於泥洹之道。

庚四、明勸捨疑惑

汝等宜各精進，求心所願，無得疑惑中悔，自為過咎。生彼邊地七寶宮殿，五百歲中，受諸厄也。

己四、彌勒領行

彌勒白言：受佛重誨，專精修學，如教奉行，不敢有疑。

丁七、誠斷五惡（分三：戊一、略舉五惡。戊二、詳釋五惡。戊三、結說五惡）

戊一、略舉五惡（分三：己一、歎前起後，總示修心。己二、總舉勸意，斷惡修善。己三、徵問五惡）

己一、歎前起後，總示修心

佛告彌勒：汝等能於此世，端正意，不作眾惡，甚為至德。十方世界，最無倫匹。所以者何？諸佛國土，天人之類，自然作善，不大為惡，易可開化。

己二、總舉勸意，斷惡修善

今我於此世間作佛，處於五惡五痛五燒之中，為最劇苦。教化群生，令捨五惡，令去五痛，令離五燒，降化其意，令持五善，獲其福德，度世長壽泥洹之道。

己三、徵問五惡

佛言：何等五惡？何等五痛？何等五燒？何等消化五惡，令持五善，獲其福德度世長壽泥洹之道。

戊二、詳釋五惡（分五：己一、殺生之惡。己二、偷盜之惡。己三、邪淫之惡。己四、妄語之惡。

己五、意業眾惡）

己一、殺生之惡（分四：庚一、明殺生之業。庚二、明殺生之報。庚三、明因果不爽。庚四、結勸斷惡修善）

庚一、明殺生之業

其一惡者：諸天人民蠕動之類，欲為眾惡，莫不皆然。強者伏弱，轉相剋賊，殘害殺戮，迭相吞噬，不知修善，惡逆無道。

庚二、明殺生之報（分三：辛一、總說。辛二、現生之報。辛三、來生之報）

辛一、總說

後受殃罰，自然趣向。神明記識，犯者不赦。故有貧窮下賤，乞丐孤獨，聾盲瘡瘍，愚癡弊惡，至有尪狂不逮之屬。又有尊貴豪富，高才明達，皆由宿世慈孝，修善積德所致。

## 辛二、現生之報

世有常道，王法牢獄，不肯畏慎，為惡入罪，受其殃罰，求望解脫，難得勉出，世間有此目前現事。

### 辛三、來生之報

壽終後世，尤深尤劇。入其幽冥，轉生受身。譬如王法，痛苦極刑。故有自然三塗，無量苦惱。轉貿其身，改形易道，所受壽命，或長或短。魂神精識，自然趣之。當獨值向，相從共生。更相報復，無有止已。殃惡未盡，不得相離。展轉其中，無有出期，難得解脫，痛不可言。

### 庚三、明因果不爽

天地之間，自然有是，雖不即時卒暴應至，善惡之道，會當歸之。

### 庚四、結勸斷惡修善

是為一大惡一痛一燒，勤苦如是。譬如大火焚燒人身，人能於中一心制意，端身正行，獨作諸善，不為眾惡者，身獨度脫，獲其福德度世上天泥洹之道，是為一大善也。

己一、偷盜之惡（分四：庚一、明盜因。庚二、明盜業。庚三、明盜報。庚四、結勸斷惡修善）

### 庚一、明盜因

佛言：其二惡者，世間人民，父子兄弟，室家夫婦，都無義理，不順法度，奢淫嬌縱，各欲快意。

### 庚二、明盜業

任心自恣，更相欺惑。心口各異，言念無實。佞諂不忠，巧言諛媚。嫉賢謗善，陷入怨枉。主上不明，任用臣下；臣下自在，機偽多端。踐度能行，知其形勢。在位不正，為其所欺。妄損忠良，不當天心。<sup>86</sup>臣欺其君，子欺其父，兄弟夫婦，中外知識，更相欺誑。各懷貪欲，瞋恚愚癡。欲自厚己，欲貪多有。尊卑上下，心俱同然。破家亡身，不顧前後。親屬內外，坐之滅族。或時室家知識，鄉黨市里，愚民野人，轉共從事。更相利害，忿成怨結。富有慳惜，不肯施與，愛保貪重，心勞身苦。

庚三、明盜報（分三：辛一、總說。辛二、現生之報。辛三、來生之報）

### 辛一、總說

如是至竟，無所恃怙，獨來獨去，無一隨者。善惡禍福，追命所生，或在樂處，或入苦毒，然後乃悔，當復何及。

### 辛二、現生之報

世間人民，心愚少智，見善憎謗，不思慕及，但欲為惡，妄作非法。常懷盜心，慾望他利，消散磨盡，而復求索。邪心不正，懼人有色，不豫思計，事至乃悔。今世現有王法牢獄，隨罪趣向，受其殃罰。

### 辛三、來生之報

因其前世，不信道德，不修善本，今復為惡，天神剋識，別其名籍。壽終神逝，下入惡道。故有自然三塗，無量苦惱。展轉其中，世世累劫，無有出期，難得解脫，痛不可言。

## 庚四、結勸斷惡修善

是為二大惡二痛二燒，勤苦如是。譬如大火焚燒人身，人能於中一心制意，端身正行，獨作諸善，不為眾惡者，身獨度脫，獲其福德度世上天泥洹之道，是為二大善也。

己三、邪淫之惡（分三：庚一、明邪淫業。庚二、明邪淫報。庚三、結勸斷惡修善）

庚一、明邪淫業

佛言：其三惡者，世間人民，相因寄生，共居天地之間。處年壽命，無能幾何。上有賢明長者尊貴豪富，下有貧窮廝賤，尪劣愚夫，中有不善之人。常懷邪惡，但念淫泆，煩滿胸中。愛欲交亂，坐起不安；貪意守惜，但欲唐得。眄睞細色，邪態外逸。自妻厭憎，私妄出入，費損家財，事為非法。交結聚會，興師相伐，攻劫殺戮，強奪無道。恶心在外，不自修業。盜竊趣得，欲擊成事。忍勢迫脅，歸給妻子，恣心快意，極身作樂。或於親屬，不避尊卑，家室中外，患而苦之，亦復不畏王法禁令。

庚二、明邪淫報

如是之惡，著於人鬼。日月照見，神明記識。故有自然三塗，無量苦惱。展轉其中，世世累劫，無有出期，難得解脫，痛不可言。

### 庚三、結勸斷惡修善

是為三大惡三痛三燒，勤苦如是。譬如大火焚燒人身，人能於中一心制意，端身正行，獨作諸善，不為眾惡者，身獨度脫，獲其福德度世上天泥洹之道，是為三大善也。

己四、妄語之惡（分三：庚一、明妄語業。庚二、明妄語報。庚三、結勸斷惡修善）

### 庚一、明妄語業

佛言：其四惡者，世間人民，不念修善。轉相教令，共為眾惡。兩舌，惡口，妄言，綺語。讒賊鬥亂，憎嫉善人，敗壞賢明。於傍快喜。不孝二親，輕慢師長。朋友無信，難得誠實。尊貴自大，謂已有道。橫行威勢，侵易於人。不能自知，為惡無恥。自以強健，欲人敬難。不畏天地神明日月，不肯作善，難可降化。自用偃蹇，謂可常爾，無所憂懼，常懷憍慢。

庚二、明妄語報（分二：辛一、總說。辛二、明因果不爽）

辛一、總說

如是眾惡，天神記識。賴其前世頗作福德，小善扶接，營護助之。今世為惡，福德盡滅，諸善鬼神，各去離之，身獨空立，無所復依。

辛二、明因果不爽

壽命終盡，諸惡所歸，自然迫促，共趣奪之。又其名籍，記在神明。殃咎牽引，當往趣向。罪報自然，無從捨離。但得前行，入於火鑊。身心摧碎，精神痛苦。當斯之時，悔復何及？天道罔然，不得蹉跌。故有自然三塗，無量苦惱。展轉其中，世世累劫，無有出期，難得解脫，痛不可言。

庚三、結勸斷惡修善

是為四大惡四痛四燒，勤苦如是。譬如大火焚燒人身，人能於中一心制意，端身正行，獨作諸善，不為眾惡，身獨度脫，獲其福德度世上天泥洹之道，是為四大善也。

己五、意業眾惡（分五：庚一、明意惡業。庚二、明意惡報。庚三、結勸斷惡修善）

### 庚一、明意惡業

佛言：其五惡者，世間人民，徙倚懈惰，不肯作善，治身修業。家室眷屬，飢寒困苦，父母教誨，瞋目怒應。言令不和，違戾反逆，譬如怨家，不如無子。取與無節，眾共患厭。負恩違義，無有報償之心。貧窮困乏，不能復得，辜較縱奪，放恣遊散。串數唐得，用自賑給，耽酒嗜美，飲食無度，肆心蕩逸，魯扈抵突。不識人情，強欲抑制。見人有善，妬嫉惡之。無義無禮，無所顧難，自用識當，不可諫曉。六親眷屬，所資有無，不能憂念。不惟父母之恩，不存師友之義。心常念惡，口常言惡，身常行惡，曾無一善。不信先聖諸佛經法，不信行道可得度世，不信死後神明更生。不信作善得善，為惡得惡。欲殺真人，鬥亂眾僧。欲害父母兄弟眷屬。六親憎惡，願令其死。如是世人，心意俱然，愚癡蒙昧，而自以智慧。不知生所從來，死所趣向。不仁不順，惡逆天地。而於其中，慚愧僥倖，欲求長生，會當歸死。慈心教誨，令其念善。開示生死善惡之趣，自然有是，而不肯信之。苦心與語，無益其人，心中閉塞，意不開解，大命將終，悔懼交至。不豫修善，臨窮方悔，悔之於後，將何及乎。

### 庚二、明意惡報

天地之間，五道分明，恢廓窈冥，浩浩茫茫。善惡報應，禍福相承，身自當之，無誰代者。數之自然，應其所行，殃咎追命，無得縱捨。善人行善，從樂入樂，從明入明；惡人行惡，從苦入苦，從冥入冥。誰能知者？獨佛知耳。教語開示，信用者少，生死不休，惡道不絕。如是世人，難可具盡，故有自然三塗，無量苦惱。展轉其中，世世累劫，無有出期，難得解脫，痛不可言。

### 庚三、結勸斷惡修善

是為五大惡五痛五燒，勤苦如是。譬如大火焚燒人身，人能於中一心制意，端身正念，言行相副，所作至誠，所語如語，心口不轉，獨作諸善，不為眾惡，身獨度脫，獲其福德度世上天泥洹之道，是為五大善也。

戊三、結說五惡（分四：己一、結說惡業。己二、結說惡報。己三、結說惡因。己四、結說因果）

### 己一、結說惡業

佛告彌勒：吾語汝等，是世五惡，勤苦若此。五痛五燒，展轉相生，但作眾惡，不修善本，皆悉自然入諸惡趣。

己三、結說惡報（分二：庚一、現生之報。庚二、來生之報）

庚一、現生之報

或其今世先被殃病，求死不得，求生不得，罪惡所招，示眾見之。

庚二、來生之報

身死隨行，入三惡道，苦毒無量，自相燋然，至其久後，共作怨結，從小微起，遂成大惡。

己三、結說惡因

皆由貪著財色，不能施惠，癡欲所迫，隨心思想，煩惱結縛，無有解已。厚已諍利，無所省錄。富貴榮華，當時快意。不能忍辱，不務修善。威勢無幾，隨以磨滅。

#### 己四、結說因果

身坐勞苦，久後大劇。天道弛張，自然糾舉，綱維羅網，上下相應，熒熒忪忪，當入其中。古今有是，痛哉可傷。

丁八、重重誨勉（分五：戊一、總示佛意。戊二、重教修善。戊三、示佛悲懷。戊四、世尊懸記。

戊五、彌勒奉行）

戊一、總示佛意

佛語彌勒：世間如是，佛皆哀之。以威神力，摧滅眾惡，悉令就善。棄捐所思。奉持經戒，受行道法，<sup>94</sup>無所違失，終得度世泥洹之道。

戊二、重教修善

佛言：汝今諸天人民，及後世人，得佛經語，當熟思之，能於其中，端心正行。主上為善，率化其下，轉相敕令，各自端守。尊聖敬善，仁慈博愛。佛語教誨，無敢虧負。當求度世，拔斷生死眾惡之本，當離三塗無量憂怖苦痛之道。汝等於是廣植德本，布恩施惠，勿犯道禁。忍辱精進，一心智慧。轉相

教化，為德立善。正心正意，齋戒清淨，一日一夜，勝在無量壽國為善百歲。所以者何？彼佛國土，無為自然，皆積眾善，無毛髮之惡。於此修善十日十夜，勝於他方諸佛國中為善千歲。所以者何？他方佛國，為善者多，為惡者少，福德自然，無造惡之地。唯此間多惡，無有自然，勤苦求欲，轉相欺殆。心勞形困，飲苦食毒。如是惡務，未嘗寧息。

戊三、示佛悲懷（分四：己一、勉人修善得道。己二、勉人皈敬三寶。己三、勉人離惡滅苦。

己四、勉人往生極樂）

〔己一、勉人修善得道

吾哀汝等天人之類，苦心誨喻，教令修善。隨宜開導，授與經法，莫不承用。在意所願，皆令得道。

〔己二、勉人皈敬三寶

佛所遊履，國邑丘聚，靡不蒙化。天下和順、日月清明。風雨以時，災厲不起。國豐民安，兵戈無用。崇德興仁，務修禮讓。

〔己三、勉人離惡滅苦

佛言：我哀愍汝等諸天人民，甚於父母念子。今我於此世作佛，降化五惡，消除五痛，絕滅五燒，以善攻惡，拔生死之苦。

己四、勉人往生極樂

令獲五德，升無為之安。

戊四、世尊懸記

吾去世後，經道漸滅，人民詭偽，復為眾惡。五燒五痛，還如前法。久後轉劇，不可悉說，我但為汝略言之耳。佛語彌勒：汝等各善思之，轉相教誡，如佛經法，無得犯也。

戊五、彌勒奉行

於是彌勒菩薩合掌白言：佛所說甚善，世人實爾。如來普慈哀愍，悉令度脫，受佛重誨，不敢違失。

丙三、教見彌陀示當明信（分五：丁一、教見彌陀。丁二、阿難求見。丁三、壽佛放光。丁四、彼此相見。

丁五、當機述見）

丁一、教見彌陀

佛告阿難：汝起，更整衣服，合掌恭敬，禮無量壽佛。十方國土諸佛如來，常共稱揚讚歎彼佛，無著無礙。

丁二、阿難求見

於是阿難起整衣服，正身西面，恭敬合掌，五體投地，禮無量壽佛。白言：世尊，願見彼佛安樂國土，及諸菩薩聲聞大眾。

丁三、壽佛放光

說是語已，即時無量壽佛，放大光明，普照一切諸佛世界。金剛圍山、須彌山王、大小諸山，一切所有，皆同一色。譬如劫水彌滿世界，其中萬物沈沒不現，混濁浩汗，唯見大水，彼佛光明，亦復如是。聲聞菩薩，一切光明，皆悉隱蔽，唯見佛光，明耀顯赫。

丁四、彼此相見

爾時，阿難即見無量壽佛，威德巍巍，如須彌山王，高出一切諸世界上，相好光明，靡不照耀。此會四眾，一時悉見；彼見此土，亦復如是。

#### 丁五、當機述見

爾時，佛告阿難及慈氏菩薩：汝見彼國，從地已上，至淨居天，其中所有微妙嚴淨自然之物，為悉見不？阿難對曰：唯然，已見。汝寧復聞無量壽佛，大音宣布一切世界化眾生不？阿難對曰：唯然，已聞。彼國人民，乘百千由旬七寶宮殿，無所障礙，徧至十方供養諸佛，汝復見不？對曰：已見。彼國人民，有胎生者，汝復見不？對曰：已見。其胎生者，所處宮殿，或百由旬，或五百由旬。各於其中，受諸快樂，如忉利天上，亦皆自然。

丙四、明信佛智誠勿生疑（分五：丁一、彰明不了佛智之過。丁二、彰示明信佛智之益。

丁三、舉勝顯劣以誠勿疑。丁四、舉喻明失悔過見佛。

丁五、重示明信佛智勿疑）

#### 丁一、彰明不了佛智之過

爾時慈氏菩薩白佛言：世尊！何因何緣，彼國人民，胎生化生？佛告慈氏：若有眾生，以疑惑心，修諸功德，願生彼國，不了佛智、不思議智、不可稱智、大乘廣智、無等無倫最上勝智。於此諸智，疑惑不信；然猶信罪福，修習善本，願生其國。此諸眾生，生彼宮殿，壽五百歲，常不見佛，不聞經法，不見菩薩聲聞聖眾。是故於彼國土，謂之胎生。

#### 丁二、彰示明信佛智之益

若有眾生，明信佛智，乃至勝智，作諸功德，信心迴向，此諸眾生，於七寶華中，自然化生，跏趺而坐，須臾之頃，身相光明，智慧功德，如諸菩薩具足成就。

#### 丁三、舉勝顯劣以誠勿疑

復次，慈氏！他方諸大菩薩，發心欲見無量壽佛，恭敬供養，及諸菩薩聲聞聖眾。彼菩薩等，命終得生無量壽國，於七寶華中，自然化生。彌勒當知，彼化生者，智慧勝故；其胎生者，皆無智慧，於五

百歲中，常不見佛，不聞經法，不見菩薩諸聲聞眾，無由供養於佛，不知菩薩法式，不得修習功德。當知此人，宿世之時，無有智慧，疑惑所致。

#### 丁四、舉喻明失悔過見佛

佛告彌勒：譬如轉輪聖王，有七寶牢獄，種種莊嚴，張設床帳，懸諸繒蓋。若有諸小王子，得罪於王，輒內彼獄中，繫以金鎖。供養飯食衣服床蓐，華香伎樂，如轉輪王，無所乏少。於意云何？此諸王子，寧樂彼處不？對曰：不也！但種種方便，求諸大力，欲自勉出。佛告彌勒：此諸眾生，亦復如是。以疑惑佛智故，生彼七寶宮殿，無有刑罰，乃至一念惡事。但於五百歲中，不見三寶，不得供養修諸善本，以此為苦。雖有餘樂，猶不樂彼處。若此眾生，識其本罪，深自悔責，求離彼處，即得如意，往詣無量壽佛所，恭敬供養，亦得偏至無量無數諸餘佛所，修諸功德。

#### 丁五、重示明信佛智勿疑

彌勒當知，其有菩薩，生疑惑者，為失大利，是故應當明信諸佛無上智慧。

丙五、正示十方菩薩往生（分四：丁一、明此土菩薩往生。丁二、明他土菩薩往生。丁三、明十方菩薩往生）

丁一、明此土菩薩往生

彌勒菩薩白佛言：世尊！於此世界，有幾所不退菩薩，生彼佛國？

佛告彌勒：於此世界，有六十七億不退菩薩，往生彼國。一一菩薩，已曾供養無數諸佛，次如彌勒者也。諸小行菩薩，及修習少功德者，不可稱計，皆當往生。

丁二、明他土菩薩往生

佛告彌勒：不但我刹諸菩薩等，往生彼國。他方佛土，亦復如是。其第一佛，名曰遠照，彼有百八十億菩薩，皆當往生。其第二佛，名曰寶藏，彼有九十億菩薩，皆當往生。其第三佛，名曰無量音，彼有二百二十億菩薩，皆當往生。其第四佛，名曰甘露味，彼有二百五十億菩薩，皆當往生。其第五佛，名曰龍勝，彼有十四億菩薩，皆當往生。其第六佛，名曰勝力，彼有萬四千菩薩，皆當往生。其第七佛，名曰師子，彼有五百億菩薩，皆當往生。其第八佛，名曰離垢光，彼有八十億菩薩，皆當往生。其第九佛，名曰德首，彼有六十億菩薩，皆當往生。其第十佛，名曰妙德山，彼有六十億菩薩，皆當

往生。其第十一佛，名曰人王，彼有十億菩薩，皆當往生。其第十二佛，名曰無上華，彼有無數不可稱計諸菩薩眾，皆不退轉，智慧勇猛，已曾供養無量諸佛，於七日中，即能攝取百千億劫大士所修堅固之法。斯等菩薩，皆當往生。其第十三佛，名曰無畏，彼有七百九十億大菩薩眾，諸小菩薩，及比丘等，不可稱計，皆當往生。

#### 丁三、明十方菩薩往生

佛語彌勒：不但此十四佛國中諸菩薩等，當往生也，十方世界無量佛國，其往生者，亦復如是甚多無數。我但說十方諸佛名號，及菩薩比丘生彼國者，晝夜一劫，尚未能盡，我今為汝略說之耳。

甲三、流通分（分四：乙一、歎經勸學。乙二、聞經得益。乙三、化周現瑞。乙四、大眾奉行）

乙一、歎經勸學（分五：丙一、明聞益廣勸當受行。丙二、教求見佛囑勿生疑。丙三、彰此經要特留百歲。

丙四、明經難聞生人重敬。丙五、結勸信順如法修學）

丙一、明聞益廣勸當受行

佛告彌勒：其有得聞彼佛名號，歡喜踊躍，乃至一念，當知此人，為得大利，則是具足無上功德。是故彌勒，設有大火，充滿三千大千世界，要當過此，聞是經法，歡喜信樂，受持讀誦，如說修行。所以者何？多有菩薩欲聞此經，而不能得。若有眾生聞此經者，於無上道，終不退轉。是故應當專心信受，持誦說行。

丙二、教求見佛囑勿生疑

吾今為諸眾生說此經法，令見無量壽佛，及其國土一切所有。所當為者，皆可求之，無得以我滅度之後，復生疑惑。

丙三、彰此經要特留百歲

當來之世，經道滅盡，我以慈悲哀愍，特留此經，止住百歲。其有眾生，值斯經者，隨意所願，皆可得度。

丙四、明經難聞生人重敬

佛語彌勒：如來興世，難值難見；諸佛經道，難得難聞；菩薩勝法，諸波羅蜜，得聞亦難；遇善知識，聞法能行，此亦為難。若聞斯經，信樂受持，難中之難，無過此難。

丙五、結勸信順如法修學

是故我法，如是作，如是說，如是教。應當信順，如法修行。

乙三、聞經得益（分二：丙一、起願益。丙二、得果益）

丙一、起願益

爾時世尊，說此經法，無量眾生，皆發無上正覺之心。

丙二、得果益

萬二千那由他人，得清淨法眼。二十二億諸天人民，得阿那含果。八十萬比丘，漏盡意解。四十億菩薩，得不退轉。以弘誓功德而自莊嚴，於將來世，當成正覺。

乙三、化周現瑞

爾時，三千大千世界六種震動，大光普照十方國土，百千音樂，自然而作，無量妙華，芬芬而降。

乙四、大眾奉行

佛說經已，彌勒菩薩，及十方來諸菩薩眾，長老阿難，諸大聲聞，一切大眾，聞佛所說，靡不歡喜。